

渠縣志卷十

城池志

眾志成城保障之雄也在德不在險金甌所以永固也然易曰王公設險以守其國豈故爲是飾崇隆誇壯麗哉蓋金城湯池與民世守而弗替也由都會以至郡邑版堵准其則袞延殊其規星羅碁布德威無遠弗屆焉矧渠爲巴夔之衝梓利之要乎舊志築城數雉西北踞山東南枕水堞墉屹屹然其間闐闐之滅沒樓櫓之廢興城湟之通塞

渠縣志

卷十 城池

十九

已不勝今昔之異而况數年來小醜奔竄任斯土者先事預防規度形勝增高培厚爲我渠百世利者尤非淺鮮所能窺測也志城池

謹按釋名城成也一成而不可毀也原道訓夏鯨作三仞之城禮運城郭溝池以爲固班孟堅賦呀周池而成淵註城有水曰池城池之說本此至若方城爲城漢水爲池又楚之所以雄南服也渠城本漢置縣屬巴郡後漢因之劉先主嘗分巴西之宕渠宣漢漢昌三縣置宕渠郡晉省入巴西郡惠

帝復分巴西置宕渠縣永嘉三年巴西陷於李雄  
譙登舉兵攻宕渠殺其巴西太守馬脫宋白曰宕  
渠城漢車騎將軍馮緄增修俗亦名車騎城晉義  
熙二年劉裕遣毛修之等討譙縱至宕渠卽此宋  
置南宕渠縣蕭齊因之梁於安漢縣置宕渠郡流  
江置北宕渠郡而改故宕渠縣置竟陽郡隋開皇  
初郡廢縣屬渠州唐武德初縣改屬蓬州劉昫曰  
縣舊治長樂山長安三年移治羅穫水是也五代  
因之宋理宗寶祐中元兵入蜀制置使蒲澤之宣

## 渠縣志

### 卷十 城池

二十

撫李會將軍張需移州治於禮義山元軍至練使  
胡載榮率州人以死拒守城得無恙至元十九年  
復舊治明因之初無城垣依山阻水編木爲柵壘  
石爲門取足啟閉而已正德八年鄢藍賊起縣令  
甘澤規度形勢甃築崇墉周圍廣四里二分長五  
百四十丈零八寸七分高一丈五尺置五門其上  
各覆以樓而城守始備崇正末毀於兵

皇朝初移治縣北八十里之周家寨歷成弘輔熊焯黃  
伉三尹康熙二年邑侯雷鳴魯親率士民開除灌

莽修復城垣並建官署民居始得入城安處雍正三年邑侯尹誥重加繕治雉堞女牆乃屹然完固因山爲城故有城而無池嘉慶七年署左蕭曹廟側城垣坍塌十餘丈署縣劉銓瑞捐俸補修八年蕭曹廟側城垣仍崩十餘丈邑侯王衍慶捐俸補修十三年渠江泛溢淹過城垣坍塌八丈有餘邑侯薛天相捐俸補修嗣是三十餘年無傾圮之患道光二十七年八月巴渝二水兩次泛漲冒南城丈餘城四隅各隙裂數丈或數十丈不等邑侯王

## 渠縣志

卷十 城池

廿一

椿源當經具文申報緩修在案嗣邑侯沈崧曾陸爲柄李崧芳張鍾瑛節次補修未竣同治元年壬戌邑侯何慶恩莅任大加修築週圍各增高三尺內作馳道炮臺立偏厦四十座俱經委員驗勘申詳餘詳邑侯何增修城垣碑記

附列城垣五門

東門 乾隆壬午年邑侯鄧獻璋題利濟巨川

匾額

南門 嘉慶辛未年邑侯崔景儼題解阜恬熙

匾額

西無

北門 康熙四十八年邑侯侯承埏題金湯永

固匾額

通濟門 在縣署前東南乾隆壬午年邑侯鄧獻

璋題文峯聳秀匾額嘉慶庚申年邑侯陳連題

江城如畫匾額

通文門 在縣署後東北邑侯鄧獻璋題天開文

運匾額

渠縣志

卷十 城池

廿二

附 康熙四年乙巳邑孝廉李珪重修城垣碑記維

明之季天憘其盈孽芽煽動城邑淪陷宕渠界在

西陲受害尤烈癸未九月燬於賊丙戌再燬丁亥

又燬五年之間刀鋸不得一閒道殣相望閭邑之

人無有齠齡幸而存者萬不得一喪亂既平無家

可歸皆設險負嵎暫圖保聚卽

國朝定鼎之後官吏猶率人民寨居城中虛無人樓櫓

敲衮池隍堙塞日傾月圯漸以成墟十有八年城

木斯拱豺虎晝見鸛鷗羣啼望而畏之人莫敢□

今

皇上嗣位之明年乃命中丞佟公來撫蜀郡少保大中丞李公親董六師奠安全蜀遊魂授首蜀疆底定佟公曰予膺

簡命輯寧西土凡茲流離胥宜佃而田宅而宅其未寧幹止者還定安集之爾良司牧幸咸副此意符下浹旬則至渠邑邑侯澱川雷公乃集掾吏隸卒師儒紳耆操斧斤控畚鍤以盛夏之月由周家寨放舟而下泊城隈躬自斬刈伐之丁丁旬有五日其

渠縣志

卷十 城池

廿三

址乃見其功無涯費未可貲左右皆難之公獨毅然曰是予之責未可以諉輿馬衣飾細至蒯緱有一可辦者予無靳出而售之得金五百以六月望日鳩工庀材百役咸集合噪成雷揮汗如雨鼓倡節杵而下者數十百人皆公自爲饘粥而鋪啜之而邑人未之聞也自夏徂秋以王眷南下工少止明年春二月尋前功會諸上臺各有捐城乃就其爲新築者二百四十五丈有奇仍而綴之者又三之二逾年而成不煩民力自古以來勞苦而功高

未有若斯之甚者也於是督撫交章紀敘

天子嘉之乃命大參何公案其勞蹟至則灌莽豁然麗  
譙巍煥鴻雁于飛炊烟漸合賦詩以贈喜而歸蓋  
將陟公以酬其瘁矣邑人曰嗟我邦之人萬死而  
甦邱隴闐闐分與長辭繫公之力獲處我土盍鐫  
之石示我子孫俾以世世而尸祝之公曰無庸誰  
司民社而復尸功慮不及此聊以語我同事庶其  
諒予之衷而成予之志乎蓋父老歡然合辭而頌  
也其辭曰潛江之水東向流上有巖邑兮蟠飛樓

渠縣志

卷十 城池

廿四

壁遺鎬池兮祖龍去烟燹蔽天兮燔我邑而成坵  
我邑既燔兮我民散我民散兮見麋鹿之晝遊忽  
見慈父兮姓惟雷檐車露冕中州來手闢草昧城  
闐開築成鉅邑宛以迴我民生還殊不惡葺土編  
茆還力作同是東西南北人此身幸免填溝壑決  
策歸來兮潛之澍自我人居兮有父母惟公之德  
兮亙萬古附邑侯何慶恩增修城垣碑記渠爲古  
宕渠郡地當東北之衝土瘠而民貧西北多山而  
東南多水潛水繞城下東南流其城背山面河西

北跨石子岡之脊因其坡坨以爲堞卑者僅逾丈高者亦不過丈餘周城可四里城內皆民宅惟中正一街通商賈焉據縣志明正德八年鄢藍氛熾縣令甘澤勅建迨獻逆之亂三燬於賊遂曠無居人叢木拱把虎豹時時游城中官民皆寨居至康熙二年癸卯縣尹雷公始奉檄修治因其舊者三之二而補綴之至四年乙巳始告竣邑孝廉李鶴汀大尹實記之嗣是以來雖歷有營度亦不過因陋就簡補苴罅漏蓋國家之承平久矣同治初元

## 渠縣志

### 卷十 城池

廿五

壬戌予庖篆茲邑始至遍閱城垣見其卑陋惄然憂之乃札記其數集邑父老而商度焉咸以費無所出先是因招勇練團勸富民捐頗踴躍已集有成數予以城防爲尤要乃就其中提銀若干鳩工庀材屬老成士董其事伐石於山卑者崇之週遭各加五尺或三尺不等其睥睨千餘相去僅尺有咫又狹其竅守陴者無所障且難施力乃約之得八百有奇少拓其堞口而守望便矣其內牆濶者數尺狹者或不盈三尺皆土非石或傾圯聞咸豐

辛酉曹逆踞吳市城中人立風雪泥淖中幾兩閱  
月殊堪憫惻於是徧鋪石板作馳道而以大石甃  
其內立偏厦四十間俾守者有所休息城東南因  
河爲濠其西北舊有溝達於河因而治之深廣相  
稱事半而功可倍共費錢若干縉論者以爲渠城  
西枕高山後溪溝環其下東臨潛水以爲池惟南  
北稍夷耳若北柵高巖頭南據高石坎而守之則  
根本可以無虞又城垣雖增而麗譙未升通文門  
須築一水城以通汲道然所費不貲而瓜期將屆

## 渠縣志

### 卷十 城池

廿六

此皆予有志未逮而期諸後人者也他若造軍械  
製旗幟鑄炮位募勇禦賊安民保境其費皆出之  
渠民其事皆職所當爲而何多述焉且吾嘗偕一  
二文上登城遠眺八濠之山皆可指數張桓侯之  
故壘在焉雖紀功之碑已不存而馬躍之溪固在  
其矛馬所至出人意表之概猶可想見東撫潛水  
思虞雍公之治績猶有存者北望龍驤山愾然永  
慕馮車騎之功烈士人至今廟祀之乃予自己未  
籤發來川庚申辛酉兩轉南北餉壬戌四月攝斯



篆亦若王黃州之記竹樓四年之間奔走不暇未  
知明年又在何處不禁感慨係之矣昔諸葛公治  
蜀道塗傳舍皆以時修治而叔孫昭子之在晉雖  
一日必葺其牆屋去之如始至予萬不敢企古人  
惟冀渠之父老子弟毋忘萑苻之憂一乃心力趨  
公嚮義以幾眾志成城予雖在遠心滋慰矣奚止  
修城垣已哉是爲記

### 水城

邑侯何旣葺城功之明年周視城之四圍慨然曰

## 渠縣志

### 卷十 城池

廿七

守固矣而井汲可憂也使城三日閉民將有望梅  
之嘆乃與紳糧耆老輩商於通文門外鑿磐石四  
丈餘作磴道俾汲者魚貫而上下兩旁砌石作夾  
寨高二丈三尺長各十五丈寬一丈六尺以蔽翼  
人行復於甬道上起樓三層祀元冥奎星等神不  
獨爲城邑壯觀實爲巴渝保障又於城趾甬牆側  
對開二門曰拱宸曰阜民以便往來上列炮臺鎗  
眼無事以時啟閉否則以一夫守之而餅壘挹注  
如故眞渠百世利哉

附

賈紱麟水城碑記古者匠

人營國背山面河兵法前左山陵右水澤誠以水者天一所生養命之源不可一日無者也渠城西北倚石子岡潛水繞其下東南流城中井鹹不可烹數千戶炊爨皆仰汲於河昔人建城之始於東南隅特開門二曰通濟曰通文皆汲道也辛酉壬戌間賊去兵來城門一閉無所得水城外人以竹筩自城罅輸之斛四十或竟日不能得危乎殆哉桂林何侯之始至蓋卽以此爲拳拳而時方多故未暇也其明年德洽政孚四境無虞乃致紳耆而

## 渠縣志

### 卷十 城池

廿八

謀焉僉以爲築水城便遂相度地勢於通文門外築甬道以達於河縱十五丈有奇橫廣一丈六尺高二丈三尺胥有奇南北列睥睨炮臺下闢小門二以便往來曰阜民曰拱宸甬道之末樹水柵建層樓其上曰奎星閣東指文峰塔西對文廟山以暢文氣中曰水府殿祀水官元冥下曰得月樓以資登眺而水城之制備矣石之工若干木之工若干土之工若干石若干丈木若干章竹若干个瓴甌之屬若干事侯首捐銀百廿金以爲之倡其餘

則取給於城居與附城居者共費錢若干緡又慮後此或有增葺復捐銀置田畝歲收租庸以爲補修計功既竣乃饗渠人以落之酒半有執爵而起者曰辛酉壬戌之交渠之人亦殆矣哉寨居者困於追呼城居者窘於樵汲及侯下車不動聲色而指揮裕如俾各安其居敬獻一觴爲侯壽又酌曰壬戌之秋餘糧棲畝而曹逆回竄渠人咸惴惴然侯不憚賢勞率眾出境禦之以遏其鋒相拒數十日卒能有成功俾收穫無虞以康爾室家且使川

渠縣志

卷十 城池

廿九

東北均陰受其福而侯不自以爲功敬獻一觴爲侯壽又酌曰城垣歷有修葺皆補苴罅漏未臻完善至侯始增高培厚今水城旣建城中無樵汲之虞卽有風鶴民志自定以共保無疆之庥蓋無事不在民如此巴蜀雖廣得如侯者數十人落落然參錯其間卽賊於何有敬再獻一觴爲侯壽於是士民數十百人莫不額手合詞而頌也紱爲正其音節稍加詮次芟繁舉要而壽諸石其詞曰惟辛酉冬盜賊鴟張曰朱曰曹踞吳市場城門晝閉守

陴宵防立風雪中兩閱蟾光城井皆鹹不堪綆汲  
炊烟將斷計無所出或竅於垣中置竹一搥彼注  
茲水斛四十人眾水寡一勺如琛賊未來薄內已  
紛紜軍書旁午游勇如雲往來梭織殆哉孤城閉  
慮舌焦開恐揖盜誰歟耿恭拜井是倣誰歟貳師  
刺泉刀妙蟻垤無靈駝鳴鮮效我侯莅止謂言無  
須自有善策子姑徐徐以待來年民力其紓今則  
未可姑要是圖先是鄉寨甫經賊過民或斃賊蠹  
居奇貨謬云親眷一倡百和構訟不休萬家俱破

渠縣志

卷十 城池

卅

侯知其害立案不行嚴禁告訐各安爾生寇來在  
吾勿爾震驚和風所被四境回春乃練民團乃中  
文告修爾戈矛製爾旌纛設險立關防城鑄礮借  
箸從容事咸握要民氣旣和民信已孚乃籌經費  
踴躍爭輸先事預防四顧躊躇果以戌秋告警萑  
苻侯率健兒親援枹鼓出境禦之勿搖我圉扼吭  
拊背蒲苞山阻謀或增竈士盡超距斬獲屢報相  
持數旬賊乃宵遁凱唱回輪民安其穫一塵不驚  
克全大局無赫赫名萬姓攀轅瓜期未代乃建水

城通文門外樓櫓雉堞胸如夙繪挹水於河不竭  
永賴惟侯智計無微不至謂百年後或有增修勸  
捐加派築室道謀何如先事豫立遠猶捐金置田  
躬親陟降租庸有額經費毋浪俾利歲修永資保  
障傾圮無虞運籌獨勩惟茲兆庶慮始實難侯初  
整旅詛祝百端泊乎反旆一邑獲安興歌孰嗣一  
瞬息間水城之建咸謂非急旣列垣墉頌乃洋溢  
千人邪許成之不日汲免扉負渴不漿乞惟侯敷  
政初無成心尊賢禮士節用愛人青災肆赦大憇

渠縣志

卷十 城池

卅一

嚴懲後有來者視此貞珉邑增生賈紱麟恭紀  
邑侯何慶恩書紳庶水城碑記後

宇宙皆分內事爲民父母苟有所裨益責奚旁貸  
耶而或者謂非常之源黎民滋懼輓近官民間亦  
多故矣匪惟懼且滋疑事易擊心難喻昔人稱人  
之好義誰不如我殆非確論抑知我有可共喻人  
自無不喻喻之深斯不求應而應之速爲民求益  
不啻民之自求益凡有益于民之事遂無不可葺  
之事予於水城之役有微會焉而紳若庶迺盡以

歸善于予予何可述予實難忘紳若庶之樂于趨  
事赴公耳城旣成誠益于地方何加于分內斯碑  
也斯文也實耶誇耶能不對之滋愧耶爰綴數言  
爾紳若庶其尙知予之滋愧也可

廉泉

余旣建水城鑿甬通之磴以爲級有泉焉涓涓出  
巖石罅潺湲不竭殆汎泉穴出也甃小池瀦之其  
清可以鑑足備中人十家朝夕之需爲顏曰廉泉  
誠以周官六事皆以廉爲本而范柏年謂居在廉

渠縣志

卷十 城池

卅二

讓之間至吳隱之咏貪泉則曰若使夷齊飲終當  
不易心然則人必有一介不取千駟弗顧之操而  
後可以當大任而不亂泉何爲哉雖然在井之坎  
曰井渫不食爲我心惻可用汲王明並受其福夫  
渫而不食至於行惻而必求王明受福以至寒泉  
勿幕始稱元吉焉養而不窮者不當如是耶若廉  
其小者也予愧未能然姑書以自警時同治三年  
甲子春仲之吉知渠縣事桂林何慶恩記

摹鑄流江保障額記

壬戌閏八月癸巳曹逆自蒲苞山宵遁余始由防  
所凱撤士民喜藩籬之無恙也羣以前四字題堂  
皇紀實耶徒滋慙怩耳今春水城告竣佈置所及  
兼資捍衛爰倩選拔貢士金遂生法家摹鑄崖面  
亦曰余所遜謝未遑者惟茲城奠如磐石庶當之  
無媿云爾同治上元甲子孟春之吉桂林何慶恩  
記

渠縣志

卷十 城池

卅三